



册府元龜
卷之三十八
至八十七



13
849
127



門 4 3
號 849
卷 127



册府元龜

淮南李嗣京叅閱

西極文翔鳳訂正

豫章黃國琦較釋

將帥部 四十五

褒異第十

隋慕容三藏開皇中為開府儀同大將軍副行軍總

管華光討嶺南酋長王仲宣以功授大將軍賜奴婢

百口加以金銀雜物

魚俱羅為大都督從晉王平陳以功拜開府賜物一

千五百段未幾沈玄愴高智慧作亂江南楊素以俱羅壯勇請與同行每戰有功加上開府高唐縣公又與素擊突厥以功進位柱國

張定和為驃騎將軍從上柱國李充擊突厥先登陷陣虜刺之中頸定和以草塞瘡而戰神氣自若虜遂敗走高祖聞而壯之遣使者齎藥馳詣定和所勞問之進位柱國封武安縣侯賞物二千段良馬二匹金百兩

張齋自高祖作相授大都督領鄉兵賀若弼之鎮壽春也常為間諜平陳之役頗有功焉進位開府儀同

三司封文安縣子邑八百戶賜物二千五百段粟二千五百石歲餘率水軍破逆賊管子游於京口薛子建於和州徵入朝拜大將軍高祖命昇御座而宴之謂齋曰卿可為朕兒朕為卿父今日聚集示無外也後賜綺羅千匹絲沈甲獸文具裝尋從楊素征江表別破高智慧於會稽吳世華於臨海位上大將軍賜奴婢六十口縑綵三百疋開皇十八年為行軍總管從漢王諒征遼東諸軍多物故齋眾猶全高祖善之賜物二百五十段

郭衍周武帝時為大將軍從武帝與齊王大戰於晉

州追齊師至高壁敗之仍從平并州以功加開府武
安縣公邑一千二百戶尉遲迥之起擊其餘黨於濟
北累戰破之超上柱國封武山郡公賞物七千段
李圓通領左翊衛驃騎將軍伐陳之役以行軍總管
從楊素出信州道以功進位大將軍進封萬安縣侯
王韶為軍正周武帝既拔晉州意欲班師韶諫止及
平齊氏以功進位開府封晉陽縣公邑五百戶賜日
馬雜畜以萬計高祖受禪累加大將軍晉陽之鎗并
州除行臺右僕射賜綵五百匹平陳之役以本官為
元帥府司馬及尅金陵進位在國賜奴婢三百口緡

緡五千段

史祥為左衛將軍煬帝即位漢王諒發兵作亂遣其
將綦良自滏口徇黎陽塞白馬津余公理自太行下
河南帝以祥為行軍總管皆大破之進位上大將軍
賜縑綵七千段女妓十人良馬二十匹轉太僕卿祥
從征吐谷渾率眾出間道擊虜破之俘男女二千餘
口賜奴婢六十人馬二百匹進位左光祿大夫拜左
驍衛將軍

楊義臣高祖仁壽初拜為朔州總管賜以御甲煬帝
嗣位漢王諒作亂代州總管李景為諒將喬鍾葵所

圍詔義臣救景義臣與戰破之以功進位上大將軍
賜物二千段雜綵五百疋女妓十人良馬二十四
來護兒為上開府從楊素破高智慧盛道延進位柱
國封永寧郡公高祖嘉其功使畫工圖其像以進尋
詔追入朝賜以宮女寶刀駿馬錦綵等物煬帝時為
左驍衛大將軍煬帝大業六年從駕江都賜物千段
令上先人家宴父老州里榮之

陳稜為東萊畱守楊玄感之亂也稜率兵至江都襲
破彭城賊帥孟讓以功進位光祿大夫賜爵信安侯
及煬帝幸江都遣稜率宿衛兵擊李子通往兗兗捷

超拜左禦衛將軍

王辨為車騎將軍煬帝初漢王諒之作亂也從楊素
討平之賜爵武寧縣男邑三百戶遼東之役以功加
通議大夫尋遷武賁郎將及上谷魏刀兒劫掠燕趙
賊勢辨發從行卒步騎三千擊敗之賜黃金二百兩
渤海賊帥高士達自號東海公衆以萬數辨擊之屢
挫其銳帝在江都宮聞而馳召之及引見禮賜甚厚
復令往信都經畧士達於是復戰破之優詔褒顯之
周羅喉初仕陳宣帝為使持節都督霍州諸軍事平
山賊十二洞除右將軍始安縣伯邑四百戶總檢校

揚州內外諸軍事賜金銀三千兩高祖時從楊素擊突厥大破之進位大將軍煬帝即位授左武侯大將軍漢王諒反詔赴楊素討平之進授上大將軍段文振初仕後周為中外府兵曹從武帝攻齊晉州下之賜物千段授上儀同進平鄴都又賜綺羅二千匹開皇末為太僕卿越雋蠻叛擊平之賜奴婢二百口煬帝時為兵部尚書從征吐谷渾以功進位右光祿大夫後為左衛大將軍卒贈光祿大夫尚書左僕射北平侯賜物一千段粟麥二千石威儀鼓吹送至墓所

宇文述周武帝時為英果中大夫高祖為丞相尉遲迥作亂以行軍總管擊其將李雋破之及平尉遲迥每有戰功超拜上柱國進爵褒國公賜縑三千疋開皇初拜左衛大將軍平陳之役以行軍總管率衆擊陳軍大敗之吳會悉平以功賜物三千段拜安州總管開皇末為太子左衛率煬帝嗣位拜左衛大將軍三年加開府儀同三司每元會冬正朝會輒給鼓吹一部大業中征高麗為扶餘道將軍臨發帝謂述曰禮七十者行役以婦人從公宜以家累自隨古稱婦人不入軍謂臨戰時耳至於營壘之間無所傷也

項藉虞姬卽其故事

周法尚爲巴州刺史破三鴟叛蠻復從柱國王誼擊走陳寇遷衡州總管四州諸軍事改封譙郡公邑二千戶高祖幸雒陽召之及引見賜金錫酒鐘一雙綵五百段良馬十五疋奴婢三百口給鼓吹一部法尚固辭帝曰公有大功於國特給鼓吹者欲令公卿知朕之寵公也伐陳之役以行軍總管隸秦孝王率舟師擊破其城州刺史熊門起擒於陣轉鄂州尋遷永州總管安集嶺南賜縑五百段良馬五百匹仍給黃州兵三千五百人爲帳內又降斬陳桂州刺史錢季

卿等賜綵五百段奴婢五十口并銀甕寶帶良馬十疋又爲嶺南安撫大使後數年入朝以本官宿衛賜綵三百段米五百石絹五百疋未幾與上柱國王世積討平桂州李光仕賜奴婢百五十口黃金百五十兩銀百五十斤仁壽中遂州獠叛復以行軍總管討平之雋州烏蠻反詔法尚擊破之賜奴婢百口物三百段蜀馬二十疋煬帝時拜左武衛將軍賜良馬一匹絹三百疋又擊破黔安夷向思多還從討吐谷渾逐捕亡散至于青海賜奴婢一百口物三百段馬七十匹又領會寧太守遼東之役以舟師指朝鮮道會

楊玄感反與將軍宇文述等破之以功進右光祿大夫賜物九百段又擊齊盜王薄孟讓等每挫其銳賜奴婢百口

王仁恭爲車騎將軍從楊素擊突厥於靈武以功拜上開府賜物三千段以驃騎將軍典蜀王軍事山獠作亂蜀王命仁恭討破之賜奴婢三百口煬帝嗣位漢王諒舉兵反從楊素擊平之以功進位大將軍拜呂衛二州刺史賜帛四千匹女妓十人遼東之役仁恭爲將軍及帝班師仁恭爲殿過賊擊走之進授光祿大夫賜絹六千段馬四十匹明年復爲前軍賜良

馬十匹黃金百兩仁恭遂進軍至新城賊數萬背城結陣仁恭擊破之帝聞而大悅遣舍人詣軍勞問賜以珍物進授光祿大夫賜絹五千匹

董純仕周爲典馭下大夫從武帝平齊以功拜儀同進爵大興縣侯增邑通前八百戶高祖受禪累遷驃騎將軍後以軍功進位上開府開皇末以勞舊拜左衛將軍煬帝初漢王諒作亂并州以純爲行軍總管河北道安撫副使從楊素擊平之以功拜柱國進爵爲郡公增邑千戶轉左驍衛將軍賜女妓十人纒五千疋

趙才爲右驍衛將軍從煬帝征吐谷渾以行軍總管
率衛尉卿劉權兵部侍郎劉雅等出合河道與賊相
遇擊破之以功進位金紫光祿大夫

李子雄爲帥都督時高祖作相從韋孝寬破尉遲迥
於相州拜上開府賜爵建昌公高祖受禪爲驃騎將
軍伐陳之役以功進位大將軍煬帝初漢王諒之作
亂也子雄授上大將軍力戰破之遷幽州總管

趙元淑爲驃騎將軍煬帝嗣位漢王諒作亂元淑從
楊素擊平之以功進位柱國拜德州總管

裴仁基開皇中爲親衛平陳之役先登陷溁拜儀同

賜物千段以本官領漢王諒府親信煬帝時爲武貴
郎將從將軍李景討叛蠻向思多於黔安以功進位
銀青光祿大夫賜奴婢百口絹五百疋

唐李高遷爲右三統軍從高祖平霍邑圍京城力戰
功最累遷左武衛大將軍封江夏郡公檢校西麟州

刺史

錢九隴爲左監門郎將從高祖平薛仁果劉武周以
前後戰功累遷右武衛大將軍又從太祖擒竇建德
平王世充從隱太子討劉黑闥於魏州力戰破賊策
勲爲最累封郟國公

樊興爲右監門將軍從太宗破薛舉平王世充竇建德積戰功累封營國公賜物二千段黃金三十錠公孫武達爲檢校右監門將軍肅州刺史擊斬突厥於張掖河太宗璽書慰勞拜左監門將軍又授詔擊鹽州叛突厥餘黨幾盡進封東萊郡公
陸長遜武德初爲五原太守及征薛舉長遜不待命而至以功拜豐州總管進封楊國公邑三千戶賜以錦袍後爲右武侯將軍屬有疾高祖親幸其第以視之其見重如此

唐俊自太宗爲渭北道行軍元帥以俊爲司馬平京
城加光祿大夫

長孫順德自義起兵拜統軍從平霍邑破臨汾下絳郡俱有戰功尋與劉文静擊屈突通執通歸京師仍畧定陝縣高祖卽位拜左驍衛大將軍封薛國公武德九年與秦叔寶等討建成餘黨於玄武門太宗踐祚與食千二百戶特賜以宮女
殷嶠字開山太宗爲渭北道元帥引爲長史與統軍劉弘基率兵長安城隋將衛孝節自金光門出戰嶠與弘基擊破之京城平賜爵陳郡公武德二年兼陝東道太行臺兵部尚書從太宗討平王世充以功進

爵鄖國公復從征劉黑闥道病卒太宗親臨喪哭之甚慟贈陝東道大行臺右僕射

柴紹爲右領軍大都督府長史大軍發晉陽兼領馬軍總管及義師至霍邑詔力戰宋老生有功下臨汾平絳郡並先登陷陣授右光祿大夫武德元年累遷左翊衛大將軍尋從太宗平薛舉破宋金剛攻平王世充於雒陽擒竇建德於武牢封霍國公賜實封千二百戶貞觀元年拜右衛大將軍二年擊梁師都於夏州平之轉左衛大將軍七年加鎮軍大將軍行右驍衛大將軍改封譙國公十二年寢疾太宗親自臨

問尋卒贈荊州都督

馬三寶爲太子監門率別擊叛胡劉拔真於北山破之又從平薛仁果遷驍衛將軍後從柴紹擊吐谷渾於岷州前後虜男女數千口累封新興縣公

屈突通初爲太宗行軍元帥長史從平薛舉特賜金銀六百兩綵物一千段尋以本官判陝東道行臺僕射及大兵圍雒陽竇建德且至太宗中分麾下以屬通令與齊王元吉圍守雒陽世充平通功爲第一尋拜陝東大行臺右僕射

姜行本爲左屯衛將軍高昌之役以行軍副總管率

衆先出伊州遂與侯君集進平高昌璽書勞之進封金城郡公賜物一百五十段奴婢七十人後從太宗征高麗至蓋牟城中流矢卒太宗賦詩以悼之贈左衛大將軍酈國公陪葬昭陵

竇軌武德初爲秦州總管時赤排羗寇漢中軌與賊連戰皆捷餘黨悉降進封鄜國公

竇琮初爲高祖大將軍府統軍從平西河破霍邑拜金紫光祿大夫封扶風郡公與段志玄等力戰隋大軍潰進兵東畧下陝縣收太原拜左領軍大將軍賜物五百段武德初以元謀之勳特恕一死拜右屯衛

大將軍復轉爲左領軍時將圍雒陽遣琮畱守陝城以督糧運王世充遣其驍將羅士信來斷糧道琮潛使人說以利害士信遂帥衆降及從平東都賞物一千四百段後以本官檢校晉州總管尋從隱太子討平劉黑闥以功封譙國公賞黃金五十斤

竇抗爲左武侯大將軍從太宗平薛舉勲居第一又從征王世充及東都平冊勲太廟者九人抗與從弟軌俱預焉朝廷榮之賜女樂一部金寶萬計

竇璡爲民部尚書從太宗平薛仁果以功時賜錦袍尋鎮益州

李孝嘗隋末爲華陰令率兵守永豐倉陰圖附義以
倉城來降拜爲左衛大將軍從平薛仁果力戰有功
高祖又念以其倉歸義手勅褒美進爵義安王邑三
千戶着屬籍宗正高祖臨朝每賜同榻而坐其寵遇
如此

牛進達爲左武衛將軍從侯君集爲交河道總管征
高昌有功累封瑯邪公賜物一千三百段

李思摩爲右武衛將軍從征遼東爲流矢所中太宗
親爲吮血其見顧遇如此未幾卒於京師贈兵部尚
書夏州都督賜東園秘器陪葬昭陵爲冢像白道山

任依蕃法燒訖然後葬

王君廓爲右領軍鎭幽州會突厥入寇君廓邀擊破
之俘斬二千餘人獲馬二十四匹高祖聞而大悅止之
入朝賜以御馬令於殿庭乘之而出又謂侍臣曰吾
聞相如此秦王日昔出血君廓往擊實建德將出戰
徐勣遇之君廓發憤大呼目及鼻耳一時流血此之
壯氣何謝古人不可以嘗例賞之復賜紫袍金帶
實靜爲夏州都督值突厥攜貳諸將出征多詣其所
靜知虜中虛實潛令人間其部落郁射設所部一孤
尼等九俟斤並率衆歸款太宗稱善賜馬百匹羊千

李大亮為安州刺史高祖令徇廣州以東行次九江
會輔公祏反大亮以計擒公祏將張善安公祏尋遣
兵圍猷州刺史左難當嬰城自守大亮率兵進拔擊
賊破之以功賜奴婢百人大亮謂曰汝輩多衣冠子
女破亡至此吾亦何忍以汝為賤隸乎一皆放遣高
祖聞而嗟異復賜僮婢二十人及討吐谷渾以大亮
為且末道行軍總管與大總管李靖等出北路涉青
海歷河源遇賊於蜀渾山接戰破之俘其名王雜畜
萬計以功進爵為公賜物千段奴婢一百五十人

李靖為行軍總管兼攝趙郡王孝恭行軍長史高祖
以孝恭未更戎旅三軍之任一以委之擊蕭銑以功
授上柱國封永康縣公賜二千五百段又為嶺南道
撫慰大使檢校桂州總管時輔公祏於丹陽反詔孝
恭為元帥靖為副以討之江南悉平於是置東道行
臺拜靖行臺兵部尚書賜物千段奴婢百口馬百匹
及突厥寇太原以靖為行軍總管尋檢校安州大都
督高祖每云李靖是蕭銑輔公祏膏肓古之名將韓
白衛霍豈能踰之太宗嗣位拜刑部尚書并錄前後
功賜實封四百戶又為代州道行軍總管進擊定襄

破之以功進封代國公賜物六百段及名馬寶器貞觀初妻亡有詔墳塋制度依漢霍光故事象燕然及積石山以旌殊績靖有疾太宗親幸第流涕謂曰公是朕平生舊交又於國有大功忽聞疾病深以為憂賜絹一千匹及薨冊賜司徒并州都督給班劍四十八羽葆鼓吹陪塋昭陵

張儉為營州都督兼護東夷校尉太宗將至遼東拜行軍總管進度遼趨建安城賊徒大潰以功累封皖城郡公賞賜甚厚

郭孝恪為安西都護會焉耆王與西突厥通親相為唇齒進貢希至孝恪表請擊之太宗許焉以孝恪為西州道行軍總管虜其王齒龍突騎支而還太宗嘉其遠立殊功遣使優勞加勳十一轉

程務挺為雒州刺史從太宗平劉黑闥以功拜營州都督府長史封東平郡公賜物二千段黃金三百兩段德操為左武衛將軍延州道行軍總管以功拜柱國爵為郡公邑千戶賜以貂裘金帶布帛千匹姜確為左屯衛將軍征遼行軍總管攻蓋牟城中流矢卒太宗甚哀悼為五言詩以傷之時人榮之賜東園秘器陪塋昭陵墳高六丈

王君愕為左武衛將軍從征遼戰傷還卒於營太宗
深痛悼之賜東園秘器陪塋昭陵墳高六丈

劉瞻為涪州刺史時劉武周連年為寇鄰城多陷賊
數攻之輒為瞻所敗及裴寂之敗也晉州以北連城
悉陷唯瞻獨守李仲文以兵保之二人并力拒戰賊
來攻之輒挫其銳及太宗復并州高祖遣使勞苦之
賜帛三萬疋米麥千石頒其將士

李君羨少以勇氣聞從太宗破宋金剛以功授上柱
國驃騎將軍加賜牛馬錦帛及宮人拜左衛府中郎
將突厥來至渭橋君羨與尉遲敬德等大破其衆太

宗謂之曰盡如我君羨用心國賊亦何憂改授左武
候中郎將封武連縣公

蘇定方貞觀初為匡道府折衝隨李靖襲突厥頡利
于積石為前鋒悉降之軍還授左武侯中郎將高祖
時為行軍總管征賀魯擒之以功遷左驍衛大將軍
封邢國公俄有思結闕侯斤都曼先鍾諸胡擁其所
部及疎勒朱俱般蔥嶺三國復叛詔定方為安撫大
使率兵討之都曼面縛出降蔥嶺已西悉定以功加
食邑邢州鉅鹿真邑五百戶顯慶五年從幸太原制
授熊津道大總管率師討北濟平之賞賜珍寶不可

勝計俄遷左武衛大將軍乾符二年卒褒贈幽州都督

尉遲敬德為右府統軍從太宗擊王世充於東都世充驍將單雄信領騎直趨太宗敬德翼太宗以出賊圍賜金銀各一篋恩盼日隆又從破徐圓朗累有戰功授秦王府左二副護軍敬德歷鄜夏二州都督封鄂國公後解職顯慶中高宗舉哀於東雲龍門廢朝三日詔京官朝集使五品以上并赴宅哭仍遣黃門侍郎劉祥道持節賫璽書往弔贈司徒并州都督所司備禮冊命給班劍三十人及羽葆鼓吹

薛仁貴自太宗遼東之役以勇敢聞擢授游擊將軍雲泉府果毅仍令北門長上并賜生口十人高祖顯慶二年詔仁貴副程名振於遼東經畧破高麗以功封河東縣男尋又領兵擊九姓突厥於天山將行高宗內出甲令試之仁貴射五重高宗大驚更取堅甲以賜之時九姓有衆十餘萬來挑戰仁貴擒其偽葉護兄弟三人而還乾封高麗內附仁貴擊其賊衆大敗高祖手勅勞之復遷左領軍衛將軍簡拔代州都督病卒贈左驍衛大將軍官造靈輦并家口給傳還鄉

劉弘基爲右光祿大夫義師至河東弘基以兵千人先濟河進下馮翊爲渭北道大使渡渭水屯於長安逆擊衛文昇一戰而捷高祖大悅賜馬二十匹及破京城功爲第一從太宗擊薛舉於扶風破之累拜右領都督封河間郡公武德元年拜驍衛大將軍以元謀之勲恕其一死又爲左一總管從太宗擊破宋金剛累封任國公尋從擊劉黑闥於洛州師旅授井越將軍備胡寇於北鄙九年以佐命功眞食九百戶太宗征遼東以弘基與前軍大總管從擊高延壽於駐驛山力戰有功太宗屢加勞勉高宗永徽元年加實

封通前一千一百戶其年卒高宗爲之舉哀廢朝三日贈開府儀三司并州都督

馮盎爲上柱國貞觀中羅賓諸洞獠叛詔令盎率部落二萬諸軍先鋒斬首千餘級太宗令其子智戴慰省之前後賞賜不可勝數

阿史那杜爾爲左驍衛大將軍貞觀十四年授行軍總管以平高昌諸人咸郎受賞杜爾以未詔奉旨秋毫無所取軍還太宗美其廉慎以高昌所得寶鈿刀并雜綵千段賜之仍令檢校北門左屯營封畢國公十九年從太宗征遼所部兵士人百其勇師旋兼授

鴻臚卿

契苾何力爲右驍衛大將軍太宗征遼東以何力爲前軍總管軍次白崖城爲賊所圍被稍中腰瘡重疾甚太宗自爲傅藥高宗乾封初爲遼東道行軍總管授平壤城虜其王還授鎮軍大將軍行左衛大將軍徙封梁國公

劉仁軌高宗乾封初爲右相兼檢校太子左中護累前後戰功封樂城縣男咸亨五年爲雞林大總管東伐新羅仁軌率兵徑渡瓠蘆河破其北方大鎮七重城以功進爵爲公

黑齒嘗之爲左領軍員外將軍高宗儀鳳中吐蕃犯邊嘗之從李敬玄劉審禮擊之審禮敗敬玄欲抽軍引却阻泥溝而計無所出嘗之夜率敢死士五百人進掩賊營吐蕃大首領跋地設棄軍霄遁敬玄因此得還高宗嘆其才畧擢授左武衛將軍兼檢校左羽林軍賜金五百兩絹五百疋仍充河源軍副使吐蕃贊婆及素和貴等賊徒三萬餘屯於良非川常之率精騎三千夜襲營殺獲二千級獲羊馬數萬贊婆等單騎而遁擢嘗之爲河源道經畧大使又賞物四百匹

王峻玄宗開元初爲隴右羣牧使吐蕃寇臨兆峻率所部擊之大潰以功加銀青光祿大夫封清源縣男兼原州都督仍拜其子班爲并州大都督府長史明年討突厥殺掠甚衆以功遷左散騎嘗侍持節朔方道行軍大總管十一年代張說爲相追錄破胡之功加金紫光祿大夫仍充朔方軍節度大使

張說爲朔方軍節度大使時慶州方渠降胡康願子自立爲可汗舉兵反說以討賊功賜實封三百戶

郭虔瓘爲左驍衛將軍兼北庭都護開元二年春突厥默啜遣其子移涅可汗及同俄特勒率精騎圍逼

北庭虔瓘固守使勇士伏於路左斬同俄賊衆乞降以功拜冠軍大將軍行右驍衛大將軍又下制進封太原郡開國公俄轉安西副大都護攝御史大夫四鎮經畧安撫使進封潞國公賜實封一百戶

郭知運爲簡投伊州刺史兼伊吾軍使開元二年春副郭虔瓘破突厥於北庭以功封介休縣公知雲麾將軍擢拜右武衛將軍吐蕃入寇隴右知運擊敗之拜鄯州都督隴右諸軍節度大使六年又率兵討吐蕃掩獲萬計獻捷拜知運爲兼鴻臚卿攝御史中丞加封太原郡公八年六州胡康待賓等反詔知運與

王峻討平之拜左武衛大將軍賜金銀器百事雜綵千段九年卒於軍贈梁州都督錫米粟五百斛絹帛五百段

王君奭為右衛副率及郭知運卒遂代為河西隴右節度使遷右羽林軍將軍判涼州都督事開元十六年冬吐蕃大將悉諾邏率眾入寇太斗谷又移攻其州君奭襲至青海俘獲其眾及羊馬萬數以功遷羽林軍大將軍依舊判涼州都督封晉昌伯玄宗又嘗於廣達樓引君奭及妻夏氏設宴賜以金帛

張守珪為平樂府別將開元初突厥入寇北庭守珪請引兵自蒲昌輪臺擊之及賊敗以功特加游擊將軍後十五年授瓜州刺史吐蕃暴至城下守珪縱兵擊敗之以功加銀青光祿大夫仍以瓜州為都督府以守珪為都督二十一年轉幽州長史兼御史中丞營州都督河北節度副大使先是契丹及奚連年為邊患及守珪到官頻出擊之每戰皆捷斬契丹首領可突于首傳於東都明年春守珪獻捷會籍田禮畢酬宴玄宗賦詩以褒美之拜守珪為輔國大將軍右羽林大將軍兼御史大夫仍賜雜綵一千匹及金銀器物等

州府元龜 卷之十 王忠嗣為左威衛將軍河西討擊副使兼簡較代州都督為王昱所陷貶東陽府左果毅屬河西節度使杜希望謀叛新城玄宗詔追忠嗣赴河西既下新城忠嗣之功居多因授左威衛郎將專知行軍兵馬又大破吐蕃以功最詔拜左金吾衛將軍同正員

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

將帥部

四十六

褒異第十一

唐李嗣業為中郎將玄宗天寶七載安西都知兵馬使高仙芝奉詔總軍專征勃律選嗣業與郎將田珍為左右陌刀將遂長驅至勃律城擒勃律王吐蕃公主斬藤橋以兵三千人成於是拂林大食諸胡七十

二國皆歸國家款塞朝獻嗣業之功也繇此拜右威
武將軍十載又從平石國及破九國胡并背叛突騎
施以跳盪加特進肅宗在鳳翔至德二年九月嗣業
從廣平王收復京城賊衆大敗走河北郭子儀遂收
東都嗣業以功加開府儀同三司衛尉卿封虢國公
食實封二百戶乾元二年正月與諸將同圍相州爲
流矢所中瘡欲愈臥於帳中忽聞金鼓之聲因大叫
瘡中血出數升注地而卒帝聞之震悼嗟惜久之詔
贈武威郡王其賜贈及緣葬事所司倍於嘗式仍令
官給靈輿通還所在

王思禮爲雲麾將軍金城太守祿山反哥舒翰爲元
帥奏思禮加開府儀同三司兼太嘗卿充元帥府馬
軍都將肅宗至德二年九月思禮從元帥廣平王收
西京旣破賊思禮領兵先入宮又從郭子儀戰陝城
曲沃新店賊軍旣敗遷戶部尚書封霍國公食實封
三百戶乾元初與李光弼來朝勅朝官四品已上出
郊迓上元初加司空自武德以來三公不居宰輔唯
思禮而已二年四月薨贈太尉官給靈輿差鴻臚卿
一人充使監護喪事

衛伯玉爲神策軍兵馬使出鎮安西肅宗乾元二年

十月擊逆賊史思明僞將李歸仁破走之以功遷右羽林軍大將軍知軍事轉四鎮北庭行營節度使獻俘百餘人至關下遷神策軍節度上元二年二月史思明領衆西下圖長安史朝義率其黨夜襲陝州伯玉以兵逆擊大破賊於永寧賊退進位特進封河東郡公

郭子儀爲朔方節度使時安祿山反玄宗天寶十四載十一月詔子儀東討祿山遣大同軍使高秀嵩寇河曲子儀擊敗之進收雲中爲邑開東陁以功加御史大夫及肅宗卽位祿山死詔子儀還鳳翔進位司

空充關內河東副元帥旣平河東河西河南賊以功加司徒封代國公食邑千戶尋入朝肅宗遣兵仗戎容迎于灞上肅宗勞之曰雖吾之家國實繇卿再造及還東都命子儀經營北討乾元元年七月破賊河上擒僞將安守忠以獻遂朝京師勅百僚班迎於長樂驛進位中書令上元三年二月用子儀爲朔方河中北庭潞儀澤沁等州節度行營兼興平定國副元帥老本管觀察處置等使進封汾陽郡王出鎮絳州三月子儀辭赴鎮賜御馬銀器雜絲別賜絹布四萬疋端以賞軍代宗卽位以子儀守太尉充北道汾寧

涇原河西已東通和蕃及朔方招撫觀察使後自涇陽入朝帝御安福門待之命子儀樓上行朝見禮宴賜隆厚

僕固懷恩世襲都督玄宗時爲左領軍大將軍天寶十五載與李光弼合勢及史思明戰于恒山趙郡沙河嘉山皆大破之功居多肅宗卽位於靈武懷恩累從郭子儀及廣平王破賊皆立殊功以前後功加開府儀同三司鴻臚卿同正員同節度副使封豐國公食實封二百戶乾元元年九月遣九節度擊安慶緒於相州從郭子儀領朔方行營又副李光弼二年進

封大寧郡王遷御史大夫朔方行營節度使上元二年冬加工部尚書勅李輔國及嘗叅官等送上大官造食代宗卽位以懷恩副天下兵馬元帥雍王領河東節度行營及鎮西廻紇兵馬赴陝州仍許懷恩母及妻隨懷恩之陝州行營廻紇可敦卽懷恩之女也時廻紇通會于陝州帝特崇姻好以寵之

李光弼爲河北節度使時玄宗幸蜀肅宗埋兵於靈武追光弼及郭子儀赴行在授光弼戶部尚書兼太原尹北京留守同中書門下平章事及賊將史思明蔡希德高秀嵩牛延珣等四僞帥率衆十餘萬來攻

太原光弼率敢死之士出擊大破之收清夷橫野等
軍擒賊將李弘義以歸詔守司空兼兵部尚書中書
門下平章事進封魏國公食實封八百戶乾元元年
與關內節度使王思禮入朝勅朝官四品已上出城
迎謁遷侍中改封鄭國公二年七月爲天下兵馬元
帥趙王係之副知節度行營事八月兼幽州大都督
府長史出統河南諸軍於內及收復懷州以功進爵
臨淮郡王累加實封一千五百戶俄拜太尉內殿宴
送御製詩以寵之朝臣畢和寶應元年五月光弼進
封臨淮郡王賜鐵券以代宗廣德二年薨及葬詔宰

臣已下相送於延平門

李抱玉爲鄭陳潁亳四州節度肅宗乾元中史思明
陷雒陽抱玉守河陽南城擊退賊帥周華固河陽復
懷州皆功居第一遷澤州刺史代宗卽位爲澤潞節
度使加領陳鄭二州遷兵部尚書廣德元年吐蕃寇
京師羣盜充斥詔抱玉兼鳳翔節度使討之以功遷
司空

辛雲京爲太原節度虜畏雲京不敢惕息太原大理
無烽火之虞累加簡較左僕射同中書門下平章事
以代宗大曆三年八月薨代宗追悼發哀冊贈太尉

輟朝三日十一月葬遣中使弔祭

時宰相及諸道節度使祭者凡七十

餘饌饌菓彫飾器流豐盈窮極奢靡士庶觀者如堵

嚴武為劍南節度使成都尹代宗廣德二年破吐蕃七萬餘衆拔當胸城十月取鹽川城改簡較吏部尚書封鄭國公

田神功為平盧軍節度都知兵馬使擒逆賊劉展以功遷簡較工部尚書汴宋等八州節度使代宗大曆三年入覲尋加簡較右僕射赴尚書省視事特詔宰臣百官送上仍加知省事以寵之入覲關廷遣疾信宿而終代宗悼惜為之撤樂廢朝三日贈司徒賜絹

一千疋布五百端特許百官弔喪賜屏風茵褥於靈座并賜千僧齋以追福至德已來將帥不兼二事者哀榮無比

李納為平盧軍節度使時李希烈圍陳州納遣兵與諸軍奮擊大破之因解圍加簡較司空封五百戶李忠臣代宗時為淮西節度觀察使同華節度周智光舉兵反詔忠臣與神策將李太清等討平之大曆二年加簡較工部尚書寔封通前三百戶五年加蔡州刺史簡較右僕射知省事李靈曜之叛田承嗣使姪悅援之忠臣與諸軍大破之汴州平十一年十二

月加簡較司空平章事

伊慎爲果毅代宗大曆八年江西節度使路嗣恭討
領南哥舒晃之亂以慎爲先鋒直逼賊壘疾戰破之
斬晃於泔溪函首獻于闕下嗣恭表慎功授連州長
史知當州團練使德宗時爲蘄州刺史充節度都知
兵馬使建中末車駕在梁洋慎進兵迎擊李希烈之
甥劉戒虛擒之以功拜安州刺史兼御史大夫仍賜
實封一百戶

馬璘爲太嘗卿時蕃戎寇邊詔璘赴援河西廣德初
僕固懷恩不順誘吐蕃入寇代宗避狄陝州璘卽日

自河右轉鬪戎虜追擊俘斬數千繇是雄名益振代
宗還宮召見慰勞之授兼御史大夫永泰中爲涇原
節度城堡獲全虜不敢犯加簡較左僕射帝甚重之
遷簡較左僕射知省事詔宰臣百僚於尚書省送上
進封扶風郡王大曆十一年卒德宗悼惜之廢朝贈
司徒

郝廷玉初爲李光弼帳中愛將肅宗乾元中史思明
再陷維陽廷玉擒賊將徐璜解中澗之圍前後以戰
功累授開府儀同三司試太嘗卿封安邊郡王累遷
秦州刺史代宗大曆八年廷玉卒追錄舊勳贈工部

尚書

王栖曜肅宗時爲浙東節度王璵馬軍兵馬使代宗
廣德中草賊袁晁起亂台州御史中丞袁倬東討奏
栖曜爲偏將生擒袁晁收復郡邑十六授嘗州別駕
浙西都知兵馬使時江左兵荒栖曜擊賊大潰遷試
金吾大將軍李靈曜反于汴州浙西觀察使李涵俾
栖曜將兵爲河南犄角以功加銀青光祿大夫累加
至御史中丞

張萬福代宗時爲和州刺史行營防禦使時賊將康
白觀擁兵掠循淮而東萬福追而殺之代宗發詔以
勞之賜衣一襲宮錦十襲後自泗州刺史徵拜右金
吾將軍詔圖形凌煙閣數賜酒饌衣服并勅度支籍
口畜給其費

薛嵩爲相衛節度使卒代宗命工部尚書李晁使于
相州弔祭

曲環自玄宗天寶中爲果毅別將安祿山反守鄧州
拒賊功居多超授左清道率又從李抱玉守河陽南
城尋別將兵守澤州破賊驍將安曉勅特拜羽林將
軍又將別部兵合諸軍同討史朝義平河北累轉金
吾大將軍因隨李抱玉移軍京西代宗大曆中領兵

隴州類破吐蕃加特進太常卿又詔以邠隴兵五千大破戎虜於劔南加太子賓客賜以名馬與諸將討涇州叛將劉文喜平之加開府儀同三司兼御史中丞充邠隴兩軍都知兵馬使累破李納逆黨以功最加御史大夫德宗建中三年十月加簡較左常侍充邠隴行營節度使又大破李希烈逆黨於陳州城下加簡較工部尚書兼陳州刺史希烈平加環兼許州刺史加實封三百戶後加簡較左僕射卒廢朝一日贈司空賻布帛米粟有差

楊朝晟德宗建中初爲葦泉府果毅從李懷光討劉文喜於涇州斬獲生擒居多授驃騎大將軍稍爲右先鋒兵馬使後李納寇徐州從唐朝臣征討嘗冠軍鋒以功授開府儀同三司簡較太子賓客德宗在奉天以朝晟爲左廂兵馬使下咸陽以挫朱泚加御史中丞實封一百五十戶

李抱真爲昭義軍節度使德宗建中三年田悅以魏博反抱真與馬燧敗悅兵遂解臨洛及邢州之圍以功加簡較兵部尚書復與燧圍魏州又敗悅於城下以功加簡較右僕射興元初遷簡較左僕射平章事破朱滔於經城以功加簡較司空食實封五百戶

李芄爲河陽三城懷州節度觀察使與河東節度馬
燧等諸軍破田悅於洹水以功授簡較兵部尚書累
封開封郡王食實封一百戶
馬燧代宗時爲河東節度使前政軍敗之後兵甲寡
弱燧乃塞險以遏奔衝及朝於京師加簡較兵部尚
書令還太原與諸軍擊敗田悅兵加燧同中書門下
平章事德宗初詔加燧魏州大都督府長史兼魏博
貝等州節度觀察招討等使及帝幸奉天引軍還太
原及帝還京加燧奉誠軍及晉絳慈隰節度使并管
內諸軍行營副元帥與渾瑊同討李懷光赴河中軍

軍詔嘗叅官送至通化門懷光平乃下詔褒美遷光
祿大夫并令還太原是役也帝賜燧宸宸台衡二銘
并序三年二月入朝册拜司徒侍中北平王仍賜妓
樂及薨詔贈太傅祔廟宜令所司供少牢仍給鹵簿
從宅至廟并量供人夫兼令太嘗博士簡較
渾瑊爲折衝果毅節度使安思順遣瑊提偏師大破
阿布思部遷中郎將安祿山構逆瑊從李光弼出師
河北定諸郡邑遷右驍衛將軍及肅宗卽位於靈武
瑊統兵赴行在至天德遇蕃軍入寇瑊擊敗之從郭
子儀收兩京討安慶緒破賊於新鄉改簡較太僕卿

克武絳衛軍使又從僕固懷恩討史朝義前後數十戰朝義平加開府儀同三司太常卿賜實封二百戶又爲朔方行營左廂兵馬使從郭子儀討吐蕃於邠州以功加御史中丞會吐蕃大入寇至奉天城拒戰於莫谷大破蕃軍以功加太子賓客復屯於奉天華州周智光反郭子儀討之令瑊領馬步萬人攻下同州智光平詔以邠寧慶三州隸朔方軍郭子儀領之子儀令瑊先率兵至邠州便於宜祿縣防秋歲餘加兼御史大夫代宗大曆十一年子儀入朝令瑊知邠寧慶三州兵馬留後十三年廻紇侵太原以瑊爲石

嶺關以南諸軍知兵馬使率兵逐之虜騎引退其年八月加簡較工部尚書兼單于副都護振武軍使十四年入爲左金吾衛大將軍建中四年李希烈遣間諜詐爲瑊書與希烈交通瑊奏其狀德宗特保證之仍賜瑊馬一匹并鞍轡錦綵二百疋興元元年正月以瑊爲行在都知兵馬使二月賜實封五百戶是日德宗移幸山南城分布諸軍擊敗逆賊李懷光追射之三月加簡較左僕射同中書門下平章事兼靈州都督靈鹽豐夏等州定遠西城天德軍節度等使仍充朔方邠寧振武等道兼永平軍奉天行營兵馬副

元帥上臨軒授鉞用漢拜韓信故事是月瑊將軍赴京畿破賊朱泚六月加瑊侍中論收京城之功加實封八百戶七月德宗還營以瑊守本官兼河中尹河中絳慈隰節度使仍充河中同陝虢節度及管内諸軍行營兵馬副元帥改封咸寧王九月賜瑊大寧里第女樂五人入第之日宰臣節將送之又以李懷光未平加朔方行營兵馬副元帥與河東節度使馬燧會兵進討貞元元年八月河中平加簡較司空四年七月加邠寧慶副元帥十二年二月加簡較司徒兼中書令諸使副元帥如故十五年二月二日薨于鎮

廢朝五日羣臣於延英奉慰詔贈太師賻贈絹布四千疋米粟三千石及喪車將至又爲廢朝應緣喪事所司准式支給命京兆尹監護葬日賜絹五百疋田緒爲魏博節度使時朱滔率兵兼引迴紇之衆南侵緒遣兵助王武俊李抱真大破朱滔于經城以功遷簡較工部尚書

李晟爲左羽林將軍代宗廣德初鳳翔節度使孫志直署晟總遊兵擊破黨項羗高玉等以功授特進試光祿卿大曆初李抱玉鎮鳳翔署爲右軍都將四年吐蕃圍靈州抱玉遣晟擊之吐蕃囚解靈州之圍而

去拜開府儀同三司無幾兼左金吾衛大將軍涇原
四鎮北庭都知兵馬使并總遊兵無何節度使馬璘
與吐蕃戰於鹽倉兵敗晟率所部橫擊之拔璘出亂
兵之中以功封合川郡王德宗卽位吐蕃寇劔南乃
詔晟將出神策兵救之授太子賓客建中二年魏博
田悅反將兵圍臨洛邢州詔以晟爲神策先鋒都知
兵馬使救臨洛尋加兼御史中丞三年正月復以諸
道軍擊敗悅軍於洹水遂進攻魏州以功加簡較左
散騎嘗侍實封百戶無幾兼魏府左司馬及至武俊
攻趙州晟乃獻狀請解趙州之圍欲引兵趨定州與

張孝忠合勢欲圖范陽德宗壯之加晟御史大夫德
宗在奉天詔晟赴難晟引軍踰飛狐師次代州詔加
晟簡較工部尚書神策行營節度使實封二百戶及
李懷光反專駕幸梁州帝歎曰早從李晟之言三蜀
可坐致也詔授尚書左僕射同中書門下平章事以
安衆心後拜晟司徒兼中書令實封一千戶德宗至
自興元晟戎服謁見于三橋帝駐馬勞之賜永崇里
第及涇陽上田延平門之林園女樂八人入第之日
京兆府供帳酒饌賜教坊樂具鼓吹迎導宰臣節將
送之帝思晟勲力製紀功碑俾皇太子書之刊石立

於東渭橋又令太子書碑詞以賜晟後為中書令奉
 朝請貞元四年三月詔為晟立五廟五年九月晟與
 侍中馬燧見於延英殿上嘉其勲力詔圖其像於舊
 臣之次仍令皇太子書其文以賜晟晟刻石於門左
 九年八月薨帝震悼出涕廢朝五日令百官就第臨
 弔命京兆尹李克監護喪事官給葬具賜賻加等比
 大歛帝手書致意送柩前
 謝玄佐為宋州刺史德宗建中二年加兼御史中丞
 宋毫節度等使李正已死子納匿喪謀叛而李洧以
 徐州歸順納遣兵圍之詔玄佐與諸軍援洧與賊接

戰大破之斬首萬餘級錄是轉輸路通加御史大夫
 收濮州降將楊令暉分兵挾以徇濮陽遂降其將高
 彥超以通濮陽津延萬戶兼曹濮觀察
 使

李元諒為鎮國軍節度使元諒奉天賊朱泚造
 偽將何望之襲潼關遂據關元諒自潼關將所部遂
 援華州軍元振以功加御史中丞是時尚可孤守藍
 田元諒為將為賊所害不能逾渭南元諒功居多遷
 華州刺史兼御史大夫潼關防禦鎮國軍節度使尋
 加簡毅工部尚書貞元元年五月詔元諒與副元帥

李晟進收京邑帝還宮加簡較尚書左僕射實封七百戶賜甲第女樂貞元三年詔元諒將本軍從渾瑊與吐蕃會盟于平涼與瑊俱申號令嚴其部伍而還時謂元諒有將帥之風德宗嘉之賜馬十匹金銀器錦綵等甚厚四年春加隴右節度支度營田觀察臨洮軍使移鎮良原九年十一月卒帝甚悼惜廢朝三日贈司空賻布帛米粟有差

杜希全爲朔方軍節度使德宗居奉天希全首將所部以赴難加簡較戶部尚書行在都知兵馬使

邢君牙初爲平盧軍兵馬使累從田神功戰代歷將

軍試光祿勳神功旣爲兖鄆州節度令君牙領防秋兵入鎮好時屬吐蕃凌犯代宗幸陝君牙隸屬禁軍扈從又以戰功加鴻臚卿封河間郡公德宗貞元三年遷右神策軍行營節度鳳翔隴州觀察使加簡較工部尚書吐蕃犯邊且耕且戰西戎不能爲患尋加簡較右僕射十四年卒廢朝一日贈司空賻布帛米粟有差

尚可孤德宗建中四年爲兼御史中丞荆襄應援淮西使以所統之衆赴山南累有戰功及涇原兵叛詔徵可孤軍至藍田擊破之興元元年三月遷簡較工

部尚書兼御史大夫神策京畿渭南商州節度使五月李晟率可孤收京城可孤爲先鋒京師平以功陞簡較右僕射封馮翊郡王增邑通前八百戶實封二百戶及李懷光以河中叛詔可孤帥師與諸軍征討次於沙苑遇疾卒于師贈司空賻布帛米粟甚厚喪葬所須並令官給

劉潼幽州節度使恠之次子恠卒子濟代任表潼爲瀛州刺史無何怒兄濟乃請以所部西捍隴塞投瀛州兵一千五百及男女萬餘口直趣京師部伍齊整無一人犯令者德宗召潼賜燕於凌煙閣甚被恩寵

拜金紫光祿大夫簡較太子賓客兼秦州刺史御中大夫隴右經畧軍使其麾下兵士賜名隴右軍以普澗縣爲理所賜本錢五萬貫以自給
程懷直爲橫海軍節度使德宗貞元十三年來朝加簡較尚書右僕射仍賜安業坊甲第一區妓一人他賜有差令歸滄州

戴休顏爲鹽州刺史奉天之難倍道以所部蕃漢三千人號泣赴難德宗嘉之賜實封二百戶及李晟救京師旣清宮闕休顏與渾瑊等率兵赴岐陽邀擊朱泚餘衆及策勳加簡較右僕射實封至六百戶扈駕

至京特賜女樂甲第

楊惠元爲神策京西兵馬使及田悅反叛詔惠元領禁兵三千與諸將討伐戰御河奪三橋皆惠元之功也加簡較工部尚書

李臯爲江西道節度使洪州刺史李希烈反臯分兵大破蔡山賊拔蘄州降其將李良又取黃州舒王爲元帥加臯前軍兵馬使德宗居奉天臯遣伊慎敗杜少誠以功加銀青光祿大夫進封五百戶

王武俊爲成德軍節度使德宗貞元十三年祔祖禰私廟令所司供少牢量借儀衛人夫仍令太嘗博士簡較十七年薨廢朝五日羣臣詣筵英門奉慰如尋常故事詔左庶子李上公持節贈太師絹三千疋布千端粟三千石

劉昌德宗時攝澶州刺史李希烈旣陷汴州昌以三千人守寧陵躬勵士卒大破希烈擒其將翟曜希烈退保蔡州自此不復侵軼詔加簡較工部尚書增實封通前二百戶貞元中爲涇原節度等使詔城平涼又於平涼西別築胡谷堡遂以保寧邊鄙加簡較右僕射

張建封爲徐泗節度使德宗貞元十三年入覲特以

雙日開延英召對又令建封朝參入大夫班皆示寵厚之十四年上已賜中書門下及兩省供奉官宴於曲江特令建封與諸相同榻而食貞元已後元帥節制累有入朝及却還鎮如馬燧渾瑊劉玄佐李抱真曲環之崇秩洪勳未有獲御製詩以送之建封將還鎮特賜詩及出城又令高品中使齎嘗所洗鞭以賜之曰以卿忠貞節義歲寒不移此鞭以朕久執用故以賜卿表卿忠節也建封又獻詩一首以自警勵曹華仕宣武軍為牙較吳少誠叛本軍以華驍果有智畧用為襄城戍將蔡賊攻襄城華屢敗之德宗特

賜旗序

韓全義為蔡州行營招討處置使德宗貞元十七年正月甲寅至京帝命中使就第宣慰焉壬戌宴全義於麟德殿張茂昭為義武軍節度使德宗貞元二十年十月來朝累陳奏河北及西北邊事語甚忠切德宗屢嘆曰恨見卿之晚錫宴于麟德殿賜良馬甲第及羅用錦綵極厚憲宗元和五年冬來朝十二月十二日至京師故事雙日不坐是日特開延英殿對之五刻因請遷祖考之墓來歸京兆在朝兩月未之鎮頭發瘍卒

千石喪事並令官給命京兆尹李克監護

劉濬憲宗元和初爲幽州節度使招討王承宗諸軍未進濬獨率先前軍擊破之獻逆將於闕優詔褒之明年春大軍以瀛州前後大獻俘獲賞功頗厚仍錄功拜兼中書令

程執恭爲橫海軍節度使憲宗元和四年來朝還鎮賜廐馬一匹及槍甲兩河節制久無脩覲禮者故嘉而寵之

田弘正爲魏博等州節度使憲宗元和十三年王師加兵於鄆詔弘正與五鎮之師會軍齊進時李師道遣大將劉悟率重兵以抗弘正前後合戰魏軍大捷十四年劉悟以河上之衆倒戈入鄆斬師道首請弘正請降淄青十二州平論功加簡較司徒同中書門下平章事是年八月弘正入覲憲宗徒之隆異對於麟德殿進加簡較司徒兼侍中實封三百戶

田布弘正第三子也弘正節制魏博布掌親兵國家討淮蔡布率偏師隸嚴綬軍於唐州授簡較祕書監兼殿中侍御史前後十八載破凌雲柵下郟城布皆有功擢授御史中丞及淮西平拜左金吾衛將軍兼

御史大夫

李愬憲宗時爲簡較右散騎嘗侍兼鄧州刺史克隋唐鄧節度使討蔡賊吳元濟擒之詔以愬簡較尚書左僕射兼襄州刺史山南東道節度襄鄧隋唐復郢均房等州觀察等使上柱國封涼國公食邑三千戶食實封五百戶憲宗有意復隴右故地授愬鳳翔隴州節度使未發屬李師道再叛移愬爲徐州刺史武寧軍節度及淄青平將有事燕趙以愬簡較左僕射同中書門下平章事潞州大都督府長史昭義節度使仍賜興寧里第又遷魏州大都府長史魏博節度

使後爲太子少保歸東都長慶元年十月卒於維陽穆宗聞之震悼賜賻加等贈太尉

李聽憲宗元和中爲楚州刺史統淮南之師討李師道山東平以功授簡較左散騎嘗侍穆宗長慶四年爲義成軍節度使初討李同捷時魏博行營將于志紹潛結滄鎮擅迴戈攻其帥史憲誠詔聽帥師援之大破其叛卒紹奔鎮州爲王庭湊所殺遂凱旋以功封涼國公

王智興憲宗元和中爲侍御史徐州都押牙王師誅李師道智興率徐軍八千會諸道之師進擊大破賊

於金鄉拔魚臺俘斬萬計以功遷御史中丞賊平授沂州刺史長慶初河朔復亂徵兵進討穆宗素知智興善將遷簡較左散騎嘗侍兼御史中丞玄武寧軍節度副使河北行營都知兵馬使

李光顏爲忠武軍節度使元和十一年連敗蔡賊吳元濟之衆拔賊凌雲柵憲宗大悅賜其告捷者奴婢銀錦進位簡較尚書右僕射十二年賊平加簡較司空十三年春命中官宴光顏於若第賜芻米二十餘車憲宗又御麟德殿召對賜金帶錦綵十四年西蕃入寇授鄆寧節度使光顏擊賊退之穆宗卽位就加

特進尋詔赴闕賜開化里第進加同中書門下平章事穆宗以光顏功冠諸將故召赴闕讌賜優給已而帶平章事復鎮所以報勲臣也長慶初遷鳳翔節度使依前簡較司空同中書門下平章事歲末復授許州節度使赴鎮日宰相百僚以故事送別於章敬寺穆宗御通化門臨送之賜錦綵銀器良馬玉帶等物烏重胤憲宗時爲河陽三城節度使會討淮蔡與李光顏犄角相應大小百餘戰以至誅吳元濟就加簡較尚書右僕射

韓公武爲鄜州節度使來朝憲宗元和十三年正月

帝御麟德殿對公武賜銀器繒錦及馬

王沛爲李光顏行營兵馬使別統勁兵攻討吳元濬
蔡賊平隨光顏入朝光顏具陳沛功加御史大夫統
兵還鎮光顏受詔討鄆寇反李師道誅詔分許州兵
戍于邠以沛爲都將救鹽州擊退吐蕃以功加寧州
刺史遷陳州又汴州李芥反詔沛兼忠武軍節度副
使率師討芥平之加簡較右散騎嘗侍

劉悟爲鄆州李師道牙門都將及王師致討師道遣
悟將兵援田弘正悟因迴軍趨鄆圍其內城兼以火
攻其門不數刻梟師道以獻元和末悟自淄青節知

兵馬使兼監察御史擢拜簡較工部尚書兼御史大
夫義成軍節度使封彭城郡王仍賜實封五百戶錢
二萬貫莊宅各一區

朱克融爲盧龍軍節度副大使知節度事兼幽州長
史敬宗寶曆二年五月卒詔贈司徒仍令所司擇日
備禮冊命仍賻布帛三百段米粟二百石差光祿大
夫崔芸克弔祭使通事舍人韋翹克副使將作監王
堪克冊贈使金部郎中蕭澣克副使

劉沔爲振武軍節度使單于大都護文宗開成中黨
項雜虜大擾河西沔率吐渾契苾沙陁三部落諸族

討襲大破之告捷而還以功進簡較戶部尚書會廻紇部饑烏介可汗奉太和公主至漠南求食移沔河東節度使詔與幽州張仲武協力招撫廻紇竟破虜寇迎公主還宮以功進位簡較司空

李載義爲幽州盧龍軍節度副大使文宗太和三年命中使以白玉帶就幽州賜之示殊恩也五年載義入覲帝以載義有平滄景之功册拜太保同中書門下平章事仍詔中使以米麩粟豆油鹽共一千石錢二千貫綾絹二千疋柴四十車草一萬束就永寧里第宣賜又令尚食日給十人生料翌日又命以良馬

并鞍就第以錫下及賓佐將吏無不廣霑恩錫

楊元卿爲河陽節度使時魏博軍亂元卿領涇軍赴援詔賜元卿綾絹三萬疋茶五千斤葛五千疋

石雄爲河中晉絳節度使俄而昭義劉從諫卒其子禎擅主軍務朝議問罪令徐師李義佐爲招撫使越烏嶺破賊五砦斬獲千計武宗聞捷大悅謂侍臣曰今之義而有勇罕有雄比者及賊平進加簡較司空張仲武武宗會昌中爲幽州都督府長史兼御史大夫蘭陵郡王而廻鶻擾邊仲武遣其弟仲至與裨將游奉寰王如清等率銳兵大破之武宗詔加簡較兵

部尚書兼東面招撫廼鶻使

張允伸爲幽州節度懿宗咸通十年徐人作亂允伸請以弟允臯領兵伐叛懿宗不允進助軍米五十萬石鹽二萬石詔嘉之賜以錦綵玉帶金銀器等

王重榮僖宗時爲河中節度中和元年重榮傳詔徵兵明年李克用領軍至大敗巢賊收復京城其倡義啓導之功實重榮居首京師平以功進簡較太尉同平章事

王處存爲義武軍節度使時黃巢犯關僖宗出幸處存不俟詔命卽率本軍入援泊收京師王鐸第其功云勤王舉義處存爲之最以功加簡較司空又遣大將張公慶率勁兵三千令諸軍滅巢賊於泰山以功進簡較司公平章事

錢鏐以昭宗天祐二年正月十二日丙寅行册命勅定亂安國功臣鎮海鎮東軍節度使浙江東西兩道觀察處置淮南東西行營招討營田安撫兩浙鹽鐵制置發運等使開府儀同三司守侍中兼中書令杭越兩州刺史吳王錢鏐總臨兩鎮早立殊功撫制三吳久闔異政一榮封爵再換星霜蓋緣道路阻艱遂致册書留滯近者潭洪水陸並已通流元勳舉議請行

典禮莫免稽於制命俾速達於冊恩須議施行實爲
允當明甄酬之寵諧僉屬之情其所封吳王策禮宜
令所司擇日備禮冊命

冊府元龜

淮南李嗣京叅闕

西極文翔鳳訂正

豫章黃國琦較釋

將帥部 四十七

褒異第十二

梁趙犖唐僖宗時爲陳州刺史賊巢驍將孟楷擁徒
入項縣犖引兵擊之賊衆大潰生擒孟楷中和三年
朝廷聞其功就加簡較兵部尚書俄轉右僕射不數
月加司空進封潁川縣伯巢黨復與蔡州秦宗權合

勢以攻宛丘犇乞師於太祖太祖引大軍會於陳之西北陳人悉攻巢寨重圍遂解獻捷于行在五年八月除犇為蔡州節度使于時巢黨雖敗宗權益熾唯陳去蔡百餘里兵少力微日與爭戰及巢黨敗宗權誅文德元年蔡州平朝廷議勲以犇簡較司徒克泰寧軍節度使又改授浙江節度使兼領二鎮昭宗龍紀元年三月又以平巢蔡功就加平章事克忠武軍節度使仍以陳州為理所

趙翊者犇之仲弟也昭宗時為忠武軍節度使亦以陳州為理所時秦宗權未滅視每選精銳深入蔡賊雖眾終不能抗以至宗權敗焉朝廷賞勲加簡較司徒

趙翊者犇之季弟也犇為陳州刺史以翊為親從都知兵馬使時巢黨東出商鄧與蔡賊會眾至百餘萬攻陳陳人大懼翊與二兄堅心誓眾約以死節會太祖率大軍解其圍朝廷議功加簡較右僕射遙領處州刺史

羅紹威為魏博節度使唐昭宗天祐三年詔許本道立三代私廟至太祖開平元年十月帝以紹威近年以來貢輸極煩且倍於諸道帝慮其殫於事力以及

於民途勞而止之賜以南越所貢珍珠枕龍腦帶後
紹威疾革遣使上章乞骸太祖撫案動容顧使者曰
亟行語而主爲我強飯如有不可諱當世世貴爾子
孫以相報也仍命其子周翰監總軍府及訃至輒朝
三日冊贈尚書令
羅周翰紹威子也紹威薨復爲魏博節度使太祖乾
化二年帝北巡至昌樂縣周翰來見於行宮宣至內
殿對仍於御前賜食數刻乃退及辭歸鎮詔以良馬
王帶金銀器及香藥賜而遣之
王罕之爲河陽節度唐昭宗乾寧二年李克用爲邠

州行營四面都統克用表罕之爲副及誅王行瑜罕
之以功授簡較太尉食二千戶

馬行襲唐僖宗時爲金州防禦使時興元楊守亮將
襲京師道出金商行襲逆擊大破之詔升金州爲節
鎮以戍昭軍爲額卽以行襲爲節度使

龐師古爲太祖偏將援陳破蔡累有戰功遂用爲都
指揮使唐昭宗乾寧四年正月復統諸軍伐鄆拔之
擒其帥朱瑄以獻始表爲天平軍節度留後尋授徐
州節度使簡較司徒

張存敬爲諸軍都虞侯唐昭宗天順二年佐霍存董

大軍收宿州以功奏加簡較兵部尚書太祖東征徐
兗存敬屢有俘斬之功凡授指顧皆與機會矢石所
及必以身先太祖尤加優異爲行營都指揮使簡較
右僕射天復元年年春太祖以河中節度使王珂與
太原結親憑恃驕恣命存敬統大軍討之即日收絳
州生擒刺史陶建劉洎至晉州刺史張漢瑜來降二
郤平進軍國河中王珂請降太祖嘉之乃以存敬權
知護國軍留後未幾簡較司空宋州刺史未之任卒
於河中太祖痛惜開平初追贈太保

葛從周唐僖宗時爲大較從太祖破魏軍又并人圍

張全義時於河陽從周赴援太破并軍解河陽之圍
以功表授簡較工部尚書從朱琮討徐州拔豐縣敗
時溥加簡較刑部尚書昭宗大順二年八月與龐師
古同攻兗州朱瑾乾寧二年十月擒其部將孫漢筠
累立戰功自懷州刺史歷曹宿二州刺史遷簡較右
僕射三年五月從周擊并師殺戮殆盡與龐師古渡
河擊鄆四年正月下之乘勝伐兗其將朱懷英以城
來降以功授兗州留後簡較司空光化元年四月又
大破并師大軍以從周兼領邢州留後二年春幽州
劉仁恭寇魏州從周擊走之授宣義軍司馬三年八

月從太祖破并人表授簡較太保兼徐州兩使留後尋爲兗州節度使天復元年青州劉鄩陷兗州太祖命討之十一月鄩舉城降以功簡較太傅末帝即位制授潞州節度使令坐食其俸加開府儀同三司簡較太師兼侍中封陳留郡王累食邑至七千戶命近臣旌節就別墅賜之貞明初卒於家用贈太尉謝彥章事太祖爲騎將末帝嗣位用爲兩軍馬軍都軍使累與晉軍接戰有功尋領河陽節度使

張歸霸自太祖鎮宣武補劇職僖宗光啓二年與秦賊秦宗權將張鄧較勝爲飛戈所中即拔馬即逸控弦一發賊洞頸而墜遂兼騎而還太祖時於高丘下瞰備見其狀面加賞激厚以金帛及所獲馬錫之又嘗被命發伏兵掩殺千餘人奪馬數十匹尋奏授檢校左散騎嘗侍文德初與徐懷玉領兵大敗蔡賊太祖召至賞之曰昔耿弇不俟光武擊張步言不以賊遺君父弇之功爾其二焉昭宗大順中與燕人戰於內黃殺劉仁恭兵三萬餘衆戎績超特居衆將之右累官至檢校右僕射光化二年權知邢州事明年春李嗣昭以蕃漢五萬來寇歸霸堅壁設備晉軍不敢顧其城遂移攻洛州陷焉時太祖在滑頗慮邢之失

守及葛從周復洛水嗣昭北遁歸霸出兵襲之殺二萬餘衆捷至賞賜殊等旋以功奏加檢校司空天祐遷萊州刺史秩滿授左衛上將軍又除曹州刺史其秋加檢校司徒副劉知俊禦邠鳳之寇敗之太祖授禪拜右龍虎統軍改左騎衛上將軍克河陽諸軍都指揮使明年夏六月就除河陽節度使檢校太保尋加同平章事七月卒於位詔贈太尉

張歸厚歸霸之弟也太祖署爲軍較唐僖宗光啓三年夏蔡將張晔以數萬衆屯于赤墻歸厚嘗與晔單騎鬪于陣晔不能支而奔師徒乘此大捷太祖大悅

立署爲騎軍長仍以鞍馬器幣錫之昭宗龍紀初奏遷檢校工部尚書大順二年與葛從周禦晉軍於洹水殊績尤著詔加檢校右僕射其後討滄州復洛州咸以功聞太祖錄其勲命推知洛州事昭宗遷都維陽除右神武統軍天祐二年改左羽林統軍與徐懷玉同守澤州拒退并軍乃還太祖受禪加檢校司徒開平二年夏劉知俊以同州叛歸厚副楊師厚劉鄩等討平之秋軍還授亳州團練使乾化元年拜鎮國軍節度使明年以疾卒詔贈太保

張歸弁爲太祖牙校唐昭宗乾寧中以偏師佐葛從

周禦并軍于洹水光啓中又佐張存敬與燕人戰于
內黃積前後功表授檢校工部尚書大順初爲齊州
刺史明年春青寇大舉來伐時州兵既寡罄發私帑
賞給士伍青人遂遁青州平超加檢校右僕射遙領
愛州刺史從征荆襄迴轉檢校左僕射天祐三年春
太祖入魏誅牙軍歸并攻討封境悉平而歸并于高
堂入賊太猛飛矢中于臆太祖嘉之命賜銀鞍勒馬
一匹金帶一條夏五月命權知晉州冬十一月真拜
晉州刺史加檢校司空太祖授禪改滑州長劍指揮
使開平二年秋九月并軍圍平陽詔歸并統兵救之
軍至解其圍加簡較司徒

楊師厚爲徐州節度使昭宗天祐元年加諸軍行營
馬步都指揮使二年八月太祖討趙凝於襄陽命師
厚統前軍一戰敗趙凝翌日表師厚爲山南東道節
度留後即令南荊州留後趙明亦并軍上峽不決旬
并下兩鎮乃正授襄州節度使開平元年加簡較太
保平章事又加簡較太傅三年三月詔入朝詔兼潞
州行營都招討使以奇兵進攻劉知俊于鳳翔降賊
將王建制加師厚簡較太尉
牛存節爲太祖過後都指揮使攻濮之役領軍先登

遂拔其壘

唐昭宗景福二年四月下徐州臬時溥存節力戰其
功居多乾寧二年表授簡較工部尚書三年夏太祖
東討鄆州十二月存節獨率伏軍奪其濠橋諸軍俱
進四年正月陷其賊尋與葛從周降下兗州加簡較
右僕射天祐元年授邢州團練使時州兵纔及二百
晉人知之以大軍來寇太祖在鄴存節率健壯出圍
并軍不能克而去太祖召至勞慰久之厚資金帛鞍
馬加簡較司徒四年太祖授禪除右千牛衛上將軍
其秋攻潞州以存節爲行營馬步軍都排陣使開平

二年二月自右監門衛上將軍轉右龍虎統軍駐劄
雒下是歲王師敗于上黨晉人乘勝進迫澤州之城
將陷河南留守張全義召存節謀遂以本軍及左龍
武羽林等軍往應接上黨之師存節引衆啣枚夜至
澤州分布守禦晉軍焚營而退郡以獲全太祖屢嘆
賞之五月遷左龍虎統軍充六軍馬步都指揮使十
月授絳州刺史三月四月除鄜州留後六月劉知俊
以同州叛尋授同州留後未幾加簡較太保同州節
度使乾化二年加簡較大傅進封開國公三年加同
平章事詔赴闕末帝召見慰勉賞賜甚厚十一月加

開府儀同三司食邑一千戶授鄆州節度使四年加淮南西北面行營招討使控扼淮瀆邊境安之其冬蔣殷趨徐州逆命奉詔與劉鄩同討之殷棄甲而遁平徐州詔加大尉

王檀自唐僖宗中和中太祖鎮大梁檀爲小將文德元年二月討羅弘信敗魏人於內黃檀獲其將同儒邵神劍以歸補衡山都虞侯昭宗大順元年從龐師古渡淮深入討孫儒之亂奮命擊賊未幾遷順義都將天復中從太祖率西鎮之師圍鳳翔以迎昭宗屢立戎効遷左踏白指揮使從攻王師範于青丘檀以

偏師復密郡遂權知軍事克本州馬岌軍都指揮使表授簡較右僕射守密州刺史郡按淮戎舊無壁壘乃築羅城居民賴之加簡較司空開平二年六月授邢州保義軍節度使簡較司徒三年加簡較太保充潞州東面行營招討使乾化元年正月王景仁與晉人戰于栢鄉王師敗績俄而晉軍大至重圍四合太祖憂之擅密上表請駕不征而悉力枝梧竟全城壘三月以功就加簡較太傅同平章事七月加開府儀同三司簡較太尉琅瑯郡王命宣徽使趙殷衡齎詔慰諭賜絹千匹銀千兩賞守禦邢州之功也庶人友

瑋僭位授鄧州宣化軍節度使簡較太尉兼侍中末
帝即位移授許州節度加簡較太師五年蔡州刺史
王彥溫作亂擅受詔討平之加兼中書令

劉鄩以太祖開平元年授右衛上將軍克諸軍馬步
都指揮使其年秋與諸將征潞州遷簡較司徒三年
二月轉右威衛上將軍依前諸軍馬步都虞侯五月
改左龍武統軍充侍衛親軍兼馬步軍都指揮使其
年夏同州劉知俊反引岐大襲據長安分兵扼河潼
太祖幸陝命鄩西討即奪取潼關擒知俊弟知浣以
獻遂引兵收復長安知俊棄郡奔鳳翔太祖以鄩為

佑國軍兩使留後尋改佑國軍為永平軍以鄩為節
度使簡較司徒行太安尹金州管内觀察使是時西
鄙未寧鄩練兵馬撫衆獨當一面四年加簡較太保
同平章事庶人友珪篡位加簡較太傅末帝即位尤
深倚重明年夏詔鄩歸闕授開封尹遙領鎮南軍節
度使九月徐州蔣殷叛鄩與鄆師牛存節率兵攻擊
破之梟殷首以獻詔加簡較太尉
賀瓌唐昭宗天復中預平青州王師範以功授曹州
刺史兼先鋒都指揮使加簡較司空天祐二年與楊
師厚從太祖平荆襄授荆南兩使留後未幾徵還為

行營左廂步軍都指揮使累遷左龍虎統軍末帝貞明元年慶州叛爲李繼陟所據瓌以本官充西面行營馬步軍都指揮使與張筠江鳳之衆三萬下寧衍二州三年秋慶州平十二月瓌以功授滑州宣義軍節度使依前簡較太傅加同平章事

唐懷英唐昭宗光化初太祖署爲軍較天復元年冬太祖帥師迎昭宗于鳳翔時李茂貞遣大將符道昭領兵萬餘屯武功以拒太祖太祖命諸軍擊之以懷英爲前鋒領衆先登一鼓而大破之翌日太祖方至顧左右曰邑名武功今首盪逆黨真武功也乃召懷

英大加獎激仍以駿馬珍器賜之二年八月岐軍屯奉天太祖令懷英寨於岐軍之東北岐軍不勝而退昭宗還京賜迎鑿毅勇功臣是歲淮人寇徐州太祖命懷英馳騎以救之淮人遁去即以懷英爲權知晉州刺史天祐三年冬佐劉知俊破邠鳳之衆五萬於美原收十五餘寨乘勝引軍攻下鄜州以功授陝州節度使太祖授禪加簡較太保

徐懷王唐僖宗中和未爲太祖親從副將左長劍都虞侯又從破蔡賊於板橋收秦宗權八寨奏加簡較右散騎嘗侍文德初同諸軍解河陽之圍復從破徐

宿昭宗乾寧中奏加檢較刑部尚書又破朱瑾於金鄉南擒宋江以獻表授金紫光祿大夫簡較右僕射光化中授沂州刺史頃之王師範以青州叛屢出兵侵軼懷玉擊退之天復四年轉齊州防禦使加檢較司空天祐三年轉右龍虎統軍領六軍之士赴澤州晉人遂退開平元年授曹州刺史加檢較司徒明年除晉州刺史其秋晉人大至懷玉領兵破之于洪洞三年制授鄜坊節度使特進檢較大保練兵繕壁人頗安之加檢較太傅

郭言爲步軍都將唐僖宗光啓中太祖東伐徐鄆言

出奇決戰所向皆捷太祖錄其績以排陣斬斫之號委之尋表爲宿州刺史簡較右僕射

劉康乂爲太祖元從都將唐僖宗中和中從太祖連年攻討徐鄆所向多捷尤善爲營壘充諸軍壕寨使及太祖盡下三鎮議其功奏加簡較右僕射兼領軍衛

劉捍爲太祖親事指揮使時太祖迎昭宗於岐下天復三年正旦宋文通令客將郭奇使於太祖命捍復命昭宗聞其至即詔見詢東兵之事仍以錦服銀鞍勒馬賜之翌日授光祿大夫簡較司空登州刺史昭

宗還京改嘗州刺史賜號迎鑾毅勇功臣太祖授禪
授左龍虎統軍兼元從親軍馬步都虞侯及土黨纏
兵以捍爲禦營使蕃戎逼澤州命捍以兵千人赴之
并軍遂通車駕還京授捍侍衛親軍都指揮使晉人
侵晉州從幸陝廻加簡較太尉

氏叔琮爲太祖後院馬軍都將時東伐徐鄆多歷年
所叔琮身當矢石奮不顧命累遷爲指鄆使尋奏授
宿州刺史簡較右僕射遷曹州刺史昭宗天福元年
領大軍攻拔澤潞叔琮遂引兵北掠太原師還除晉
州節度使明年太祖屯軍于岐下晉軍潛襲絳州前

軍不利晉軍恃勝而攻臨汾叔琮嚴設備禦晉軍遂
退據蒲縣時太祖遣朱友寧將數萬副應悉委叔琮
節制叔琮因夜出潛師截其歸路遇晉軍遂騎盡殺
之遂拔其壘太祖聞之喜謂左右曰殺蕃賊破大原
非氏老不可叔琮乃長驅收汾州與晉人轉戰直抵
并壘軍廻以其功奏加檢校司徒

朱汝恭爲汝州刺史檢校司空唐昭宗乾化初淮夷
侵鄂渚武昌軍杜洪來乞師太祖遣友恭將兵應援
俘斬萬計以功爲穎州刺史加檢校司徒

王重師僖宗文德中爲太祖帳下都指揮使檢校右

僕射檢校中書令甲五六年於齊魯間凡經百餘戰威震
敵人尋檢校司空後知平盧軍留後加檢校司徒其
後北伐幽滄鎮定屢與晉軍接戰頗得士心故多勝
捷昭宗天祐中授雍州節度加同平章事
黃文靖為諸軍指揮使從太祖南平巢蔡北定兗鄆
皆有功唐昭宗光化初晉將李嗣昭周德威寇於山
東文靖佐葛從周統大軍禦之尋以功表授檢校右
僕射耀州刺史天祐二年春命佐楊師厚深入淮甸
赴壽春侵廬江軍至大獨山遇淮夷殺五千餘衆振
旅而還改蔡州刺史檢校司空

胡規唐昭宗天祐四年為諸軍壕寨使太祖授禪除
右羽林軍尋從劉鄩統兵收潼關擒劉知浣獻之乃
以為右龍虎統軍兼侍衛指揮使

李讜為左德勝騎軍都將從太祖討蔡賊頗有軍功
及東伐兗鄆以所部士伍俘獲甚衆改元從騎將表
授檢校右僕射

李重喬為太祖先鋒步軍都頭及太祖大舉伐蔡賊
秦宗權俾重喬以滑兵為先鋒及東討徐州下豐
二邑轉右廂馬步軍指揮使

范居實為感義都頭鄭州馬軍指揮使幽州劉仁恭

舉衆寇魏郡居實與葛從周張存敬率兵救魏大破
幽滄之衆於內黃太祖迎昭宗於岐下以居實爲河
中馬軍都指揮使及唐昭宗還京賜迎鑾毅勇功臣
遙領錦州刺史又遷左龍驤馬軍都指揮使從征淮
南廻改登州刺史轉右神勇軍使開平元年用兵於
潞州命居實統軍以解澤州之圍授耀州刺史
劉知俊唐昭宗大順中爲開道指揮使從太祖討蔡
賊秦宗權及攻徐州皆有功尋補徐州馬步軍都指
揮使攻海州下之遂奏授刺史天復初歷典懷鄭二
州從平青州以功奏授同州節度使天祐三年冬以

兵五千破岐軍六萬於美原自是連克鄜延五州乃
加簡較太傅平章事開平二年春三月命爲潞州行
營招討使知俊未至潞夾寨已陷晉人引軍方攻澤
州聞知俊至乃退尋改西路招討使六月大破岐軍
於幕谷俘斬千計李茂真僅以身免三年五月加檢
校太尉兼侍中封大彭郡王

趙德諱唐僖宗光啓中太祖爲秦州四面行營都統
表德諱爲副仍領襄州節度使蔡州平以功累加官
爵封淮安王

機於黃揆承嗣擒之以獻賊平以功授

冊府元龜

淮南李嗣京叅閱

西極文翔鳳訂正

豫章黃國琦較釋

將帥部 四十八

褒異第十三

後唐李承嗣少仕郡為右職唐僖宗中和二年從武
 皇討賊關輔為前鋒王師之攻華陰黃巢令偽客省
 使王汀會軍機於黃揆承嗣擒之以獻賊平以功授
 汾州司馬改榆次鎮將朱攻之亂遣承嗣率萬人援

鄜州至渭橋迎扈車駕王行瑜既殺朱玫承嗣會鄜
夏之師入定京城獲偽相裴徹鄭昌圍函送朱玫襄
王首獻於行在駕還官賜號迎鑾功臣簡較工部尚
書守嵐州刺史賜軍錢二萬貫孟方立之襲遼州也
承嗣設伏擊其歸兵大敗之獲其將奚忠信以功授
洛州刺史及張滂之加兵於太原也時鳳翔軍營霍
邑承嗣帥一軍攻之岐人夜遁追擊至趙城合大軍
攻平陽旬有三日而拔師旋收教練使簡較司空
李存信唐昭宗大順中為蕃漢都較從武皇討李儔
降赫連鐸白義誠以功簡較左僕射從入關討王行

瑜加簡較司空領彬州刺史

李存進昭宗光化中為永安軍使鴈門以北都知兵
馬使天復初破氏叔琮前軍於洞渦三年授石州刺
史莊宗初嗣位又為步軍右都簡較司空師出井陘
授行營馬步軍都營虞侯破汴軍於栢鄉論功授汾
州刺史轉簡較司徒俄兼西南面行營招討使出師
收慈州換慈沁二州刺史二年定魏傳授天雄軍巡
按使十四年權蕃漢馬步副總管從攻揚劉戰胡柳
十六年以本職兼領振武節度使時王師據德勝渡
汴軍據村渡存進造橋成人皆伏其智莊宗舉酒曰

存進吾之杜預也賜寶馬御衣進簡較太保兼魏博馬步都將與李存審固德勝十九年汴將王瓚率衆攻北城存進機拒應之汴軍退加簡較太傅

李漢韶初事莊宗為河東牢城指揮使會契丹侵北鄙表令漢韶率師進討既而大破胡寇以功加檢校右僕射

李存璋昭宗光化二年為澤州刺史入為牢城使從李嗣昭討雲州叛將王暉平之改教練使簡較司空五年立莊宗夷內難頗有力焉改河東馬步都虞候兼領鹽鐵又從破汴軍於夾城轉簡較司徒拓鄉之

役為三鎮排陣使十二年從盟朱友謙於猗氏授汾州刺史汴將尹皓攻慈州逆戰敗之十三年王搆逼太原存璋率汾之軍入城固守授大同軍防禦使應蔚朔等州都知兵馬使秋契丹逼雲州存璋拒守虜退以功簡較太傅大同軍節度雲應等州觀察使十九年四月以疾卒於雲州同光初追贈太尉平章事李存賢以天祐五年權知蔚州以禦吐渾六年權沁州刺史先是州當賊境不能保守存賢至郡乃移復舊郡莊宗嘉之轉簡較司空真拜刺史九年汴人衆其無備來攻其城存賢擊退之十一年授武州刺史

山北團練使十二年移慈州刺史七月汴將尹皓攻
州城存賢督軍拒戰遁去十八年何中朱友謙來求
援命存賢率師赴之十九年汴將段凝軍五萬營臨
晉存賢拒退之以功加簡較司徒同光二年爲盧龍
軍節度使卒詔贈太傅

康君立自武皇爲鴈門節度立爲右都押衙僖宗時
從武皇入關逐黃孽收長安武皇還鎮太原授先鋒
軍使文德初李罕之既失河陽來歸於武皇且求援
焉乃以君立充南面招討使爲汾州刺史及潞州小
校安居受反武皇遣君立討平之授簡較左僕射昭

義節度使自是武皇之師運歲掠地於邢洛攻孟方
立君立嘗率澤潞之師以爲倚角加簡較司徒食邑
千戶李存孝據邢州叛武皇命君立討之以功加簡
較太保

薛志勤自武皇鎮鴈門領代北君使從入關收京城
以功簡較工部尚書河東右都押衙先鋒右軍使從
武皇救陳許平黃巢武皇遇難於上源驛志勤擊敗
汴軍昭宗大順初與李承嗣敗韓建之軍於蒙坑進
收晉絳以功授沂州刺史又從討鎮州收天長臨城
志勤皆先登陷陣王暉據雲州叛討平之以志勤爲

大同軍節度簡較司空

史儼爲武皇帳中親將昭宗乾寧中從討王行瑜時
京城大擾士庶奔迸儼分騎警衛駕比還京盜賊不
作以功簡較右散騎嘗侍屯於三橋者累月昭宗寵
錫優異

史建瑋昭宗光化中典昭德軍與李嗣昭攻汾州率
先登城擒叛將李瑋以獻授簡較工部尚書李思安
之圍上黨也建瑋爲前鋒與總管周德威赴援時汴
將王景仁營於栢鄉瑋與德威先出井陘高邑之戰
汴軍有歸志建瑋先陷其陣遂長騎追擊夜入栢鄉

俘斬數千論功加簡較左僕射十三年敗劉鄩於元
城收澶州以建瑋爲刺史簡較司空外衙騎軍都尉
蓋寓自武皇鎮太原爲左都押衙簡較左僕射昭宗
乾化三年寓從武皇入關討王行瑜特授簡較太保
開國侯邑千戶

周德威昭宗乾寧中爲鐵林軍使從武皇討王行瑜
以功授簡較左僕射移內衙軍副天祐三年與李嗣
昭合燕軍攻潞州降丁會以功加簡較太保代州刺
史代嗣昭爲審漢都將李思安之寇潞州也德威軍
余吾時汴州軍十萬築夾城圍潞州及武皇獸代莊

宗再援潞州德威大敗梁軍解潞州之圍以功加簡較太保平章事十年又擒幽州劉守光父子授簡較侍中幽州盧龍軍節度使

符存審初典武皇義兒軍從討邠州之勁兵屯龍泉寨存審奮力拔之師旋授簡較左僕射副李嗣昭討李瑋於汾州擒之以功改左右廂步軍都指揮使昭宗天祐三年授蕃漢馬步副指揮使與李嗣昭降丁會於上黨從周德威破賊夾城以功加簡較司徒授沂州刺史使領蕃漢馬步都指揮使七年加簡較太保充蕃漢副總管九年梁祖攻蓨縣存審赴援汴人

燒營而遁以功遙領邢洛慈團練使十三年二月劉鄩襲魏州存審戰於故元城大敗汴人從莊宗救瀘衛慈洛等州秋邢州閻寶降授存審安國軍節度邢洛慈等州觀察使十月載思遠棄滄州毛璋以賊降授存審簡較太傅橫海軍節度使兼領魏博馬步軍都指揮使明年就加平章事十九年平鎮州以功加簡較大傅兼侍中二十年正月師旋於魏州莊宗出城迎勞就第宴樂居無何契丹犯燕薊詔存審以本官充幽州盧龍節度使自鎮州之任同光初加開府儀同三司簡較太師中書令邑千戶賜號忠烈扶天

啓運功臣五月卒於幽州莊宗震悼久之廢朝三日
贈尚書令

袁建豐爲鐵林都虞侯從武皇破邠州王行瑜以功
遷左親騎軍使轉突騎指揮使從莊宗解圍上黨破
栢鄉陣累功加右僕射左廂馬軍使明宗爲內衙指
揮使建豐爲副北討劉守光嘗身先士伍轉都教練
使權蕃漢副總管莊宗入鄴以心腹幹能選爲魏府
都巡簡使破劉鄩下衛慈洛三郡有功加簡較司空
夏魯奇爲慈州刺史中都之戰汴人大敗魯奇擒王
彥章以獻莊宗壯之賞絹千匹梁平授鄭州防禦使

元行欽爲武寧軍節度使檢校太傅莊宗賜名紹榮
嘗內宴羣臣使相預會行欽官爲保傅合地禱而坐
酒酣樂作帝敘平生戰陣之事因左右顧視曰紹榮
安在所司奏云有勅使相預會紹榮散官殿上無位
帝徹會不懌翌日以行欽爲同平章事繇是不宴預
官於內殿但宴武臣而已

李建及爲遼州刺史莊宗胡柳之役欲收軍建及引
銀鎗效節奮擊繇是王師復振以功簡較司空魏博
內外衙都將又與汴將王瓚戰於戚城建及傷手莊
宗解御衣金帶賜之

張敬達爲廳直軍使從莊宗平河南有功加簡較工部尚書

康思立爲河東親騎軍使從莊宗解上黨圍敗梁人於栢鄉及平薊丘後戰於河上皆有功累加簡較戶部尚書右突騎指揮使莊宗即位繼改軍帥賜忠勇拱衛功臣加簡較尚書左僕射

康延孝爲捧日軍兼南面招討指揮使簡較司徒莊宗平汴延孝頗有力焉以功加簡較太保

安元信爲突陣軍都將時莊宗嗣晉王位元信從救上黨破夾寨復澤潞以功授簡較司空遼州刺史賜

玉鞍名馬栢鄉之役日晚戰酣元信重傷莊宗自臨傅藥改簡較司徒武州刺史克內衙副都指揮使山北諸州都團練副使

安金全武皇時爲騎將屢從征伐莊宗之救潞州及平河朔皆有戰功累遷刺史

閻寶莊宗時遙領天平軍節度使東西面招討等使張文禮之殺王鎔叛寶帥師進討及契丹來援鎮州前鋒至新樂衆心憂之寶見莊宗指陳方畧軍情乃安虜退加簡較侍中

李紹文莊宗時爲博州刺史預破劉鄩於故元城歷

貝陽二州刺史領天雄軍馬步副都將屯於德勝從
閻寶討張文禮爲馬步都虞侯明宗收鄆州以紹文
爲右都押衙馬步軍都將從破王彥章於中都同光
中歷徐滑二鎮副使知府事

霍彥威爲陝州留後從明宗平潞州授徐州節度使
天成初改平盧軍節度至鎮擒王公儼斬之明年冬
肆覲於汴明宗接遇甚厚累遷至簡較太尉兼中書
令王晏球爲齊州防禦使北面行營馬軍都指揮使
鄆都之亂明宗入赴內難晏球時在瓦橋遣人招之
明宗至汴晏球率騎軍從至京師以平定功授宋州

節度使天成二年王都據定州叛晏球討平之以功
授天平軍節度使未幾移鎮青州就加兼中書令
安審通明宗天成初爲齊州防禦使兼諸道先鋒馬
軍都指揮使奉詔北征會龍厓部下兵亂審通盡戮
之以功檢較太傅滄州節度使

劉彥琮爲鐵林指揮使從明宗赴難京師授華州留
後尋正授節旌

西方鄴爲奉義指揮使天成初荆渚違命明宗素知
其才力擢授夔州刺史東南面行營招討副使鄴將
偏師收復峽內三州二年昇夔州爲寧江軍以鄴爲

節度使屢奏克捷三年加檢較太保

孫璋天成初為齊州防禦使王都之據中山璋為定州行營都虞候賊平加檢較太保

張虔劄為親軍都指揮使領春州刺史明宗天成中虔劄與諸將圍王都於中山大敗契丹於嘉山之下及定州平以功授滄州節度使

晉房知溫初仕後唐明宗天成初為兗州節度使明年詔充北面招討使屯於盧臺軍以盧文進來歸特加進同平章事賞招討之功也至長興二年除平盧軍節度使累官至開府儀同三司檢較太師兼中書

令封東平王食邑五千戶食實封三百戶高祖天福

元年十二月卒於鎮贈太尉詔立神道禪康福初仕後唐明宗為朔方河西等軍節度到鎮歲餘西戎皆款附改賜福耀忠扶定保節功臣末帝清泰中加特進開國侯克西面都部署高祖受命就加檢較太尉封開國公

華溫琪仕後唐為泰州節度使明宗即位因入朝願留闕下明宗嘉而許之除左驍衛上將軍逐月別賜錢粟以豐其家後為太子少保致仕高祖天福元年十二月終於家詔贈太子太保

方太為奉國都虞侯從杜重威破張從賓於汜水高祖以其功除趙州刺史

郭金海為護聖都虞侯高祖天福二年金海從王師討范延光於魏州以功轉本軍都指揮使

王建立為青州節度使高祖天福二年封臨淄王明年封東平王五年入覲高祖賜不拜呼老兄使肩輿入朝上殿則使人扶導論者榮之尋表乞休致帝不

許乃除潞州節度使割遼沁為上黨屬郡加檢較太師進封韓王以光其故里高祖御勇德樓餞送赴鎮

賜王斧蜀馬及卒冊贈尚書令

馬全節高祖天福五年鎮安州時李金全據州叛引

淮軍為援因命全節將兵討平之以功加檢較太尉六年接鎮州行營副招討使兼排陣使與安重榮戰

於宗城大敗之鎮州平加開府儀同三司程福贇初為軍校天福七年冬從杜重威討鎮州與

安重榮大戰於宗城以功遷維州團練使檢較太尉皇甫遇高祖天福末鎮河陽少帝即位歸闕及虜南

寇從至漕州戰於鄆州北津虜衆大敗溺死數千人以功拜滑州節度使

郭璘少帝開運中鎮易州時契丹攻其郡以州兵擊

賊數獲其利朝廷嘉之就加檢校太保

漢王周初仕後唐明宗為裨較累歷郡守晉天福中

安重榮以鎮州叛從杜重威討平之以功授貝州節

度使高祖定天下移鎮徐州加同平章事乾祐元年

二月卒於鎮輟視朝三日贈中書令

劉在明後唐明宗時為奉聖左廂都指揮使領和州

刺史從幸汴州至滎陽聞朱守殷叛用為前鋒至汴

城率先登城賊平授汴州馬步軍都指揮使晉高祖

天福中李金全以安州叛在明從李守貞攻之大破

淮賊以功授安州防禦使移領絳州楊光遠據青州

叛召為行營馬步軍都指揮使領齊州防禦使青州

平遷相州留後及高祖踐阼授幽州道行營都部署

時虜守中山在明出師經畧虜乃棄城而去遂授鎮

州留後乾祐元年五月二日授鎮州節度使六月卒

于鎮贈侍中

史弘肇為許州節度使侍衛步軍都指揮使時高祖

繇蒲陝赴潞弘肇為前鋒兵士所至秋毫不犯以至

平定兩京及從駕征鄴廻加同平章事充侍衛親軍

都指揮使兼鎮宋

杜重威晉天福初典禁軍遙授舒州刺史二年張從

賓構亂據汜水晉高祖遣重威與侯益率衆破之以
功授潞州節度使與楊光遠降范延光於鄴城改許
州節度使兼侍衛親軍馬步軍副都指揮使尋加同
平章事

周高季興梁太祖時爲荆南節度使開平中破雷彥
恭於朗州加平章事

安叔千初仕後唐莊宗爲奉安都將天成初王師伐
定州命爲先鋒都指揮使王都平授秦州刺史連刺
涿易二郡清泰初契丹寇振門叔千從晉祖逆戰敗
之進位檢校太保振武節度使晉祖踐祚就加同平

章事

王商後唐天成中爲靈武都指揮使久之代還清泰
中張令昭據鄴叛商從范延光討之首冒矢石率先
登城以功授祁州刺史

何福進後唐清泰中自彰聖都虞侯率本軍從范延
光平鄴以功歷鄭隴二州防禦使

安審暉晉高祖時爲河陽節度使會李金全據安州
叛詔馬全節爲都部署領兵討之以審暉爲副安陸
平移鎮鄧州進位檢校太傅又襄州安從進叛舉漢
南之衆北攻南陽審暉登城召賊帥以讓之從進不

克而退襄州平就加檢較太尉

宋彥筠初仕晉爲防禦使從高行周破安從進於襄陽以功拜鄧州節度使

王饒仕晉高祖爲奉國軍檢較尚書左僕射天福六年從杜重威平管山以功加檢較司空遷本軍都較領連州刺史時安從進叛于襄陽高祖以饒爲行營出軍都指揮使賊平授涼州刺史復爲本軍右廂都指揮使領閬州團練使及漢祖舉義於晉陽尋討復諸夏唯管山郡爲虜所據時饒在其郡乃與李筠白再圖之儔承間盡逐其黨漢祖嘉之授鄜州觀察使後加光祿大夫賜爵齒侯

高從誨爲荆南節度使晉天福中加守中書令特襄州安從進反王師攻討從誨起戰棹饋軍食以助焉詔書褒美尋加守尚書令

劉詞仕晉爲奉國第一都虞侯從馬全節伐安陸敗淮賊萬餘衆晉祖嘉之授奉國都較累加檢較司空又從杜重威敗安重榮於宗城又破鎮陽詞自登雲梯身先士伍以功加檢較司徒沁州刺史又仕漢爲奉國右廂都較遙領閬州防禦使從漢祖平鄴加檢較太保乾祐初李守貞叛於河中太祖征之朝廷以

詞為侍衛步軍都指揮遙領寧江軍節度使充行營馬步都虞侯命分屯於河西二年正月李守貞遣敢死之士數十夜入其營詞叱短兵以擊之賊衆大敗而退河中平太祖嘉其功表為華州節度使歲餘移鎮滑臺太祖受命加同平章事

王令溫晉初為洛州團練使及安重榮稱兵於鎮州晉祖以令溫為營馬軍都指揮使與都帥杜重威敗賊於宗城以功授亳州防禦使

李建崇仕晉為申州刺史天福七年冬襄州安從進搆逆建崇拒賊至湖陽縣之花山接戰大敗之以功

授亳州團練使襄陽平遷安州防禦使

王重胤為禁軍指揮使晉天福中鎮州安重榮謀叛請分杜重威麾下兵擊敗之以功遷護聖右廂都指揮使漢初仍典禁軍從征鄴都為先鋒都較鄴都平遷深州刺史

趙暉仕漢祖乾祐初鎮鳳翔屬王景崇叛據岐山命暉為西南面行營都部署以討明年春拔之加檢校太師兼侍中國初就加兼中書令

曹英仕漢為奉國軍主檢校司徒假康州刺史乾祐初李守貞據河中叛授行營步軍都較河中平遷本

軍廂主領岳州防禦使隨太祖在魏為北面行營步軍都較從平內難國初以勅戴功授招武軍節度使檢較太傅侍衛步軍都指揮使

史彥超為龍捷指揮使太祖之赴內難彥超以本軍從國初與虎捷都指揮使何徽戍晉州會劉崇與契丹入寇攻圍州城月餘彥超與何徽叶力固拒累挫賊鋒太祖嘉其善守之功賞賜甚厚未幾授龍捷右廂都指揮使尋授鄭州防禦使劉崇之寇潞州也車駕親征以彥超為先鋒都指揮使高平之戰先登陷陣以功授華州節度使先鋒如故

高行周初隸後唐明宗帳下時明宗為總管兼鄆州行周為前軍夜涉河入東城北曙平之及莊宗平河南累加檢較太保領端州刺史明宗即位行周從王景球圍定州敗王都擒禿餒皆有功賊平遷潁州團練使晉末為鄆州節度使漢高祖入汴加守太傅兼中書令代李守貞為天平軍節度使杜重威據鄴叛漢高祖以行周為招討使總兵討之鄴平遷鄴都留守加守太尉進爵臨清王乾祐中入覲加守太保進封鄴王復授天平軍節鉞改封齊王太祖踐祚加尚書令增食邑至一萬七千戶太祖以行周耆年宿將

賜詔不名但呼王位而已廣順二年秋薨贈賻加等册贈尚書令追封秦王

安審琦仕晉少帝爲襄州節度使兼中書令屬荆人叛命潛遣舟師數千將屠襄郢審琦禦之而遁朝廷賞功就加守太保進封齊國公歲餘又加守大傅國初封南陽郡顯德初進封陳王世宗嗣位加守太尉三年拜章請覲優詔許之加守太師增食邑至一萬五百戶食實封三千三百戶

唐景思世宗時董效順指揮屯於淮上世宗親征淮南景思繼有戰功乃命遙領饒州刺史

白延遇仕晉歷典禁軍累遷至簡較司空天福中晉祖在鄴安重榮叛於鎮州帥衆數萬指闕而來晉祖命杜重威統諸將以禦之時延遇不預其行乃泣告晉祖願以身先許之及陣於宗城延遇帥其屬先犯之斬級數千晉祖聞之即命中使以寶劍良馬賜之嘗山平以功加簡較司徒充馬軍右廂都較後遷復州防禦使國初加簡較太保尋受代歸闕屬太祖親征兗海以延遇爲先鋒都較兗州平授齊州防禦使及世宗征淮南乃詔延遇爲先鋒都較與韓令坤先入揚州尋以別部屯於盛塘前後敗淮賊萬餘衆及

世宗廻自壽陽制以延遇爲同州節度使未之任所以疾卒於濠州下詔贈太尉

